

RESOLUCIÓN DA XERENCIA DO CONSORCIO GALEGO DE SERVIZOS DE IGUALDADE E BENESTAR POLA QUE SE ANUNCIA O PRAZO DE RESERVA DE PRAZA, PREINSCRIPCIÓN DE NOVO INGRESO E MATRÍCULA DE USUARIAS/OS DAS ESCOLAS INFANTÍS PARA O CURSO 2013/2014

A Lei 13/2008, do 3 de decembro, de servizos sociais, inclúe, no seu artigo 3º.e), como un dos obxectivos do sistema galego de servizos sociais, proporcionar oportunidades e recursos que garantan a igualdade entre mulleres e homes e posibiliten a conciliación entre a vida persoal, familiar e laboral e, no artigo 3º.i), garantir o apoio ás familias como marco de referencia no que se desenvolven as persoas.

O Consorcio ten como misión primordial a participación na dirección, avaliación e control da xestión dos servizos sociais de ámbito local, con especial atención na xestión integral das escolas infantís e na atención educativa e asistencial aos nenos e nenas menores de tres anos na forma de recursos, equipamentos, proxectos, programas e prestacións, e no ámbito territorial dos municipios que o compoñen, co obxecto de garantir o acceso de todos os galegos e galegas a uns servizos sociais públicos de calidade, a través dunha oferta de recursos suficiente e equilibrada territorialmente, que contribúa a reforzar a igualdade de oportunidades na utilización da rede social de atención, segundo o disposto no artigo 6 dos estatutos do Consorcio Galego de Servizos de Igualdade e Benestar.

Conforme o exposto,

RESOLVO

Artigo 1. Obxecto

A presente resolución ten por obxecto regular o procedemento de adxudicación de prazas nas escolas infantís 0-3 xestionadas polo Consorcio Galego de Servizos de Igualdade e Benestar e integradas na Rede de Escolas Infantís de Galicia "A Galiña Azul" para o curso 2013/2014.

A relación das escolas infantís xestionadas polo Consorcio xunto cos seus enderezos e horarios de apertura publicarase nas páxinas web <http://www.igualdadebenestar.org> e <http://www.escolasinfantis.net>.

Artigo 2. Requisitos para ser adxudicatario/a.

Serán requisitos imprescindibles para ser adxudicatario/a de prazas nas escolas infantís 0-3 xestionadas polo Consorcio:

1. Que a/o nena/o estea nada/o no momento da presentación da solicitude
2. Que teña unha idade mínima de tres meses no momento do ingreso
3. Que non teña cumpridos os tres anos de idade ao 31 de decembro de 2013.

Non obstante, poderá eximirse do límite de idade dos 3 anos ás nenas e aos nenos con necesidades específicas de apoio educativo, logo da emisión do ditame do equipo de orientación específica da Xefatura Territorial da Consellería de Cultura, Educación e Ordenación Universitaria correspondente, a petición das/os nais/pais ou representantes

legais e a través da escola onde soliciten a praza.

Para a reserva de praza é requisito imprescindible estar ao corrente no pagamento das cotas mensuais na data de presentación da solicitude.

Artigo 3. Criterios de prioridade para a adxudicación das prazas

As prazas vacantes nas Escolas Infantís xestionadas polo Consorcio adxudicaranse pola seguinte orde:

A. Reserva de praza:

As nenas e os nenos escolarizadas/os durante o curso 2012/2013 terán dereito preferente á renovación da súa praza sempre que reúnan os requisitos establecidos no artigo 2.

B. Novo ingreso: As prazas adxudicaranse pola seguinte orde:

1º. As/os fillas/os do persoal que preste servizo na escola para a que solicitan praza.

2º. As/os solicitantes con irmá/án con praza (renovada ou de novo ingreso) no centro para o que solicitan a praza.

3º. As/os menores con medidas administrativas de tutela ou garda en situación de acollemento familiar

4º. As prazas vacantes serán adxudicadas ás persoas solicitantes segundo a puntuación obtida pola aplicación do baremo que figura no anexo II. Esta puntuación determinará a orde de relación na adxudicación de prazas.

Artigo 4. Horario e calendario das escolas.

1. Horario:

O horario das escolas infantís xestionadas polo Consorcio será o establecido na relación de escolas que ofertan prazas para o curso 2013/2014, publicada nas páxinas web <http://www.igualdadebenestar.org> e <http://www.escolasinfantis.net>.

2. Calendario

As escolas permanecerán abertas de luns a venres, excluídos os días considerados festivos no calendario laboral e os días 2, 3 e 4 de setembro e 24 e 31 de decembro.

O curso dará comezo o día xoves 5 de setembro.

Artigo 5. Solicitudes e documentación.

1. As/os interesadas/os poderán solicitar praza a través do modelo normalizado recollido nesta resolución:

a) Reserva de praza

Para a reserva de praza as/os interesadas/os presentarán a solicitude segundo o modelo oficial Anexo I desta resolución, sinalando a casíña correspondente.

b) Novo ingreso

Para as solicitudes de novo ingreso presentárase o modelo oficial segundo o Anexo I desta resolución, sinalando a casíña correspondente. Poderase solicitar praza para máis dunha escola indicando a orde de preferencia naqueles concellos onde exista máis dunha escola. O Consorcio non estará vinculado polos criterios de preferencia sinalados na solicitude.

As/os solicitantes tanto de reserva de praza como de novo ingreso, interesadas/os en participar no

programa Cheque Infantil, deberán cubrir o apartado correspondente no anexo I desta resolución e ademais presentar:

- a) Declaración de non percibir outras axudas para o mesmo concepto, ou de percibilas coa indicación da súa contía (anexo IV)
- b) Declaración responsable de estar ao día nas obrigas tributarias e coa Comunidade Autónoma, non ser debedor por resolución de procedencia de reintegro e de estar ao día coa Seguridade Social, así como autorización á Dirección Xeral de Familia e Inclusión para que solicite a dita información á Axencia Estatal de Administración Tributaria e á Consellería de Facenda, en relación ao cumprimento das ditas obrigas tributarias estatais e coa Comunidade Autónoma de Galicia, conforme ao disposto no artigo 2.4º da orde do Ministerio de Economía e Facenda do 18 de novembro de 1999.

As/os solicitantes de novo ingreso deberán cumprimentar o Anexo II e achegar á súa solicitude a documentación que corresponda a súa situación.

De carecer de acreditación documental dalgunha das incidencias alegadas neste artigo, poderase presentar informe dos servizos sociais do concello correspondente. A falta de presentación dalgún destes documentos dentro do prazo de solicitude establecido suporá a renuncia implícita a ser valorado no apartado correspondente do baremo aplicable.

Así mesmo, cando non se tivese presentado a declaración da renda, a/o solicitante marcará a casilla no apartado correspondente do anexo I, autorizando coa súa sinatura que o Consorcio solicite a información da Axencia Estatal de Administración Tributaria en relación ao cumprimento das súas obrigas tributarias estatais. Para o suposto de que a/o outra/o proxenitora/proxenitor ou representante legal estivese nas mesmas circunstancias asinará a autorización que consta no Anexo III.

Os impresos facilitaranse nos propios centros nos que se solicite praza e nos enderezos electrónicos <http://www.igualdadebenestar.org> e <http://www.escolasinfantis.net>.

Artigo 6. Lugar e prazo de presentación das solicitudes.

1. As solicitudes de novo ingreso xunto coa documentación requirida (anexo II) e demais anexos se proceder, presentarase na escola para a que se solicita a praza.
2. No suposto de reserva de praza no que se solicite unha escola distinta a aquela na que estea matriculada a/o nena/o, a solicitude presentarase nesta escola, indicando o centro para o que solicita a reserva de praza. Isto será de aplicación cando se trate de escolas nun mesmo concello de conformidade co previsto no artigo 14.2 A) do Regulamento de réxime interno das Escolas Infantís xestionadas polo Consorcio.

O anterior será de aplicación sen prexuízo do disposto no artigo 38.4º da Lei 30/1992, do 26 de novembro, de réxime xurídico das administracións públicas e do procedemento administrativo común (BOE núm. 285, do 27 de novembro) modificado pola Lei 4/1999, do 13 de xaneiro (BOE núm. 16, do 19 de xaneiro e BOE núm. 30, do 4 de febreiro), en adiante LRX-PAC.

O prazo para a presentación das solicitudes tanto de reserva de praza como de novo ingreso será dende o día 21 de febreiro ao 21 de marzo, ambos os dous incluídos.

Excepcionalmente poderanse presentar solicitudes fóra do prazo sinalado no parágrafo anterior nos seguintes casos:

- a) Nacemento, acollemento ou adopción da/o nena/o con posterioridade ao prazo de presentación de solicitudes
- b) Cambio de concello de residencia da unidade familiar

As solicitudes presentadas fóra de prazo deberán ir xunto coa xustificación acreditativa da circunstancia que as motiva.

Artigo 7. Tramitación e avaliación das solicitudes. Publicación das listaxes provisionais e definitivas.

As Direccións ou unidades administrativas que xestionen este procedemento comprobarán que as solicitudes reúnen os requisitos recollidos nesta resolución. De non ser así, requirirase á persoa interesada para que, nun prazo de dez días, emende a falta ou achegue os documentos preceptivos, con indicación de que, se non o fixera así, se terá por desistida/o da súa petición, logo da resolución segundo o disposto no artigo 71.1º da LRX-PAC.

Na tramitación das solicitudes estarase ao previsto nos artigos 15 e 17 do Regulamento de Réxime Interior, sendo que a selección das solicitudes efectuarase en función da puntuación acadada segundo o baremo establecido no anexo II. No caso de obter igual puntuación, terán preferencia en primeiro lugar as solicitudes de xornada completa con servizo de comedor e despois da aplicación deste criterio daráselle prioridade á renda per cápita máis baixa.

A relación provisional de admitidas/os e lista de agarda, coa puntuación obtida, farase pública o día 2 de maio e poderase consultar na escola infantil, así como nas páxinas web <http://www.igualdadebenestar.org> e <http://www.escolasinfantis.net>.

As/os solicitantes poderán efectuar as reclamacións que consideren oportunas no prazo dos dez días naturais posteriores á data da exposición pública da relación provisional, que abranguerá desde o día 3 ao día 12 de maio ambos os dous incluídos.

Estas reclamacións entenderanse resoltas coa publicación da lista definitiva.

Artigo 8. Relación definitiva de adxudicatarias/os de praza.

1. A relación definitiva coa puntuación poderase consultar desde o día 27 de maio nas escolas infantís así como nas páxinas web <http://www.igualdadebenestar.org> e <http://www.escolasinfantis.net>.
2. Na relación definitiva de admitidas/os e listaxe de agarda estarán incluídas as solicitudes presentadas fóra de prazo con xustificación que teñan entrada con anterioridade á data de publicación da relación provisional de admitidas/os.
3. Contra esta resolución, que non esgota a vía administrativa, poderá interpoñerse recurso de alzada ante á Presidencia do Consorcio Galego de Servizos de Igualdade e Benestar, no prazo dun mes desde o día seguinte ao da publicación da resolución da Xerencia do Consorcio pola que se fan públicas as listas definitivas de persoas admitidas e de agarda nas páxinas web <http://www.igualdadebenestar.org> e <http://www.escolasinfantis.net>.
4. As/os solicitantes admitidas/os disporán dende o día 28 de maio ata o día 12 de xuño, ambos os dous incluídos, para matricularse presentando no centro onde obtivesen praza o impreso de matrícula debidamente cuberto xunto coa documentación prevista no artigo 19

do RRI.

O impreso de matrícula facilitarase nos propios centros, así como nas páxinas web <http://www.igualdadebenestar.org> e <http://www.escolasinfantis.net>.

5. A formalización da matrícula no prazo sinalado é imprescindible para confirmar a praza. Se non se realiza a matrícula da/o nena/o no prazo sinalado, considérase decaída/o na súa solicitude.
6. As/os solicitantes con praza concedida que renuncien á mesma quedarán excluídas/os de calquera outra praza pública de escola infantil da Xunta de Galicia. Así mesmo, unha/un nena/o só poderá ser adxudicatario/a dunha praza pública de escola infantil da Xunta de Galicia.

Artigo 9. Listaxe de agarda e cobertura das prazas vacantes.

Na xestión da listaxe de agarda e cobertura das prazas vacantes estarase ao previsto no artigo 21 do RRI.

Artigo 10. Prezos públicos



Para o curso escolar 2013/2014 será de aplicación o Decreto 49/2012, do 19 de xaneiro, polo que se aproba o réxime de prezos das escolas infantís 0-3 dependentes da Consellería de Traballo e Benestar.

Disposición derradeira

A presente resolución entrará en vigor o día da publicación do anuncio no Diario Oficial de Galicia polo que se fai pública a resolución da Xerencia do Consorcio Galego de Servizos de Igualdade e Benestar pola que se anuncia o prazo de reserva de praza, preinscrición de novo ingreso e matrícula das Escolas Infantís xestionadas polo Consorcio.

Santiago de Compostela, a 28 de xaneiro de 2013

O xerente do Consorcio Galego de
Servizos de Igualdade e Benestar



**CONSORCIO
GALEGO**
de Servizos de Igualdade e Benestar

Roberto Rodríguez Martínez

